


Sosiedade Sivil Realiza Diskusaun Públika Sobre Proposta OJE 2020



DILI, 03 outubru 2019 (TATOLI) – Organizasaun Naun Governamentál (ONG) Lao Hamutuk, FONGTIL, no Core Group Transparency (CGT), realiza diskusaun públika sobre proposta Orsamentu Jerál Estadu (OJE) 2020.

Iha diskusaun ne'e, sosiedade sivil envolve oradór sira hosi Parlamentu Nasionál (PN) bankada opozisaun, no Ministériu Finansa. Partisipante sira mai hosi sosiedade sivil rasik, juventude, no estudante universitariu sira.

Diretór Ezekutivu Forum Organizasaun Naun Governamentál Timor-Leste (FONGTIL), Daniel dos Santos, hateten soru-mutu ida ne'e ho objetivu atu fahe informasaun preliminaríriu ba partisipante sira kona-ba planu OJE 2020, nune'e mós ezekusaun orsamentu 2019.

“Sosiedade sivil iha esperansa boot ba Parlamentu Nasionál no husu atu halo diskusaun ida ho rigór no hatuur metin interese povu nian aas liu. Tanba povu prezisa desizaun ida ne'ebé fó benefísiu direta ba sira tanba tinan 10 ona povu kontinua halerik ba nesesidade bázika hanesan bee-moos, mudansa klimatika ne'ebé afeta tebes, comunidade agrikultura sempre hasoru dezafiu tanba produsaun menus”, Diretór Ezekutivu FONGTIL afirma bainhira halo abertura ba diskusaun públiku ne'ebé hala'o iha salaun Katedral ohin.

Aléinde ne'e husu mós ba PN atu halo diskusaun ho kle'an ba orsamentu sira ne'ebé aloka ba setór produtivu sira liuliu saúde, edukasaun, agrikultura, infraestrutura bázika tanba setór hirak ne'e maka iha relasaun direta ho povu.

Daniel argumenta tan, diskusaun ida ne'e atu promove debate saudavel no konstrutivu ho sosiedade sivil no entidade hothotu liuliu Parlamentu Nasionál ho Governu bainhira halo diskusaun ba OJE tenke didi'ak no labele ataka malu de'it.

“Haree prosesu andamentu dinámika ne'ebé la'o iha ita-nia rain, apresia ba Governu tanba hahú loke espasu beibeik ba envolvimentu sosiedade sivil. Ami hetan fatin atu hato'o ideia no diskusaun iha jornada orsamentu 2020 fulan hirak liubá no mós hetan ona dokumentu 2020 nian no orsamentu sira iha 2019”, Daniel dehan.

Daniel apresia tebes ba espasu sira ne'e tanba oferese hosi Governu ba ONG iha tempu sira ikus ne'e. Transparénsia sei ajuda prodús kualidade polítika públika ida ne'ebé aseitavel no fó satisfasaun ba sidadaun sira bele mós hakiak beibeik imajen transparénsia iha mundu nia matan.

“Ami tenke afirma katak transparénsia de'it la suficiente más prezisa liután atu fó motivasaun, promove partisipasaun no adapta situasaun oioin inklui sosiedade sivil nia kolaborasaun polítika públika, liuliu planu Orsamentu Jerál Estadu kada tinan inklui OJE 2020 nu'udar intervensaun Estadu nian ba kria sósiu-ekonómiku nasaun nian ne'e importante tebes”, katak.

Proposta Lei OJE 2020 ne'ebé Governu liuhosi reuniaun Konsellu Ministru aprova ona mak ho total biliaun \$1,950.

Jornalista : Antónia Gusmão Editora : Maria Auxiliadora

Alokasaun OJE 2020 Tuir PED



Diskusaun públiku OJE 2020. Foto/Antónia Gusmão.

DILI, 03 outubru 2019 (TATOLI) – Diretór Política Ekonomia Finansa Ministériu Finansa (MF), Epifânio Alarico Martins, hateten alokasaun orsamentu iha OJE 2020 ne'e tuir setór sira ne'ebé hatuur iha Planu Estratéjiku Dezenvolvimentu (PED).

Epifânio Alarico Martins informa asuntu ne'e bainhira representa MF iha diskusaun públiku ba Orsamentu Jerál Estadu (OJE) 2020 ne'ebé hala'ó hosi Organizasaun Naun Governamentál (ONG) Lao Hamutuk, FONGTIL, no Core Group Transparency (CGT) iha salaun Katedrál, ohin.

Iha apresentasaun, Diretór Política Ekonomia Finansa Martins dehan fonte OJE ba 2020 nian tuir projesaun ne'ebé Governu halo iha millaun \$210 ne'ebé koleta hosi reseita doméstika no transferénsia hosi fundu petrolíferu millaun \$1.4 no Rendimentu Sustentavel Estimadu (RSE) hamutuk millaun \$537. Exesu levantamentu Rendimentu Sustentavel Estimadu (E.RSE) hamutuk millaun \$929, empréstimu ne'ebé finansia mós iha OJE 2020 maka millaun \$73 no utiliza saldu tezouru hamutuk millaun \$200, no total hamutuk biliaun \$1,950.

“Alvu atu atinje iha longu prazu maka tuir vizaun Timor-Leste sai nasaun ho rendimentu médiu no altu iha populasaun ne'ebé edukadu no saudavel, faze primeiru liu ona, no agora tama ba faze daruak, hahú hosi 2016 to'ó 2020 hanesan kontinua dezenvolvimentu rekursu umanu, kontinua dezenvolvimentu infraestrutur, dezenvolve indústria estratéjika, no iha faze datoluk hahú 2021 to'ó 2030 maka halakon ki'ak, setór privadu forte, diversifikasaun ekonomia”, afirma Diretór Política Ekonomia ne'e.

Nia mós apresenta sobre orsamentál ba kategoria sira ba OJE 2019 no 2020 katak, iha kategoria saláriu no vensimentu iha orsamentu 2019 hamutuk \$214,046 no ba 2020 hamutuk \$241,271.

Iha 2019, orsamentu ba bens no servisu \$478,262, no OJE 2020, mak \$738,428. Transferénsia públika iha 2019 hamutuk \$705,117 no iha 2020 hamutuk \$457,773. Iha kategoria kapital menór ba OJE 2019 hamutuk \$29.401, no ba 2020, \$53,267. Kapital dezenvolvimentu iha OJE 2019 hamutuk \$400,173, no OJE 2020 hamutuk \$459,260.

Total orsamentu 2020 ne'e, Governu liuhosi reuniaun Konsellu Ministru, kuarta ne'e, aprova ona Proposta Lei Orsamentu Jerál Estadu (OJE) ho biliaun \$1,950.